


"Hesus ta bibo" tabata e mensahe di Pader Tardif

Sordonan a scucha y invalidonan a cana den Sporthall di Santa Cruz



DIARIO

E MATUTINO DI ARUBA

DIALUNA 28 JANUARI 1991

ABONADO PA LUNA 19,00 FLS**PA EJEMPLAR 0,80 AÑA10/NO.3246

Carnaval San Nicolas Chiquito y Bunita



ORANJESTAD(AAN): Controlando duracion di e parada na San Nicolas por a nota ayera na dos lugar un duracion di casi un ora y un poco mas di 45 minuut, y tur esaki ainda cu bastante pausa y stop den dje.

Esaki ta muestra caba cu e parada tabata chiquito compara cu varios parada di otro añanan, sin embargo e tabata bunita y cu hopi ambiente. Musica tabata tin suficiente durante henter e parada y esaki a yuda hopi den exito di e parada.

Dilanti e aña aki e grupo di reinanan y runnerupnan hunto cu prins y panchonan tabata basta grandi, acompaña musicalmente pa Dynamic Brass cu tabata percursa pa musica mes ora tambe pa e grupo di Centro di Barrio Piedra Plat cu nos reina infantil Julaika Bareño.

E grupo aki tur na blanco y e reinasita di carnaval riba su carosa bunita y e sombre grandi a pone cu e parada a habri cu hopi bunita.

Little Devils cu a sigui tambe

tabata bunita y si tabata mas grandi e lo a bira un grupo sumamente bunita pa mira.

E carosa di Sailors on a boat tambe tabata bon acaba, cu su tras e grupo di mas o menos 80 marina. Esaki tabata e grupo di Anna Panneflek cu tur aña ta un di esnan cu ta sobresali.

Otro grupo cu a resalta den e parada tabata Ancient Greek di Filomena College Basis cu 190 mucha, cu Academy Brass y Boys Next Door dunando musica, sigui pa e grupo tipico hopi original Rayo di Solo cu Riqueza di nos naturaleza cu 150 participante.

Musica pa e grupo aki tabata di Aruban Angels, sigui pa e carosa cu reina di Rayo di solo.

A sigui un grupo di carta cu 4 jovencito y jovencita y un bunita road piece di oester cu su perlanan y roadpiece di coppie y grupo di forki.

Masha humoristico tabata e 4 turtuganan Ninja Turtles, hunto cu e grupo.

Fontein Kleuterschool tambe a

presenta cu 50 bailarina y Bacoba y banana. The Banana Dancers y nan tabata tin tambe 2 roadpiece di banana.

E parada a cera cu e grupo di Task Force cu Ribbon Festival cu 40 integrante, sigui pa musica di Musical Time y mes ora su tras Bonaire Club cu musica patras di Boys Next Door cu a percursa pa e "jam" di cumber cu publico cerando parada.

Cada un di e gruponan a presenta bunita, y un mas luhoso cu otro, pero tabata falta varios grupo di cumber cu no tabata den parada pa motibo economico, otro sin lider, por ehemplo Yuyu Rasmijn su grupo mes a haci falta pasobra e ta biba den exterior awor, y otro pa motibo cu no por a haya suficiente mucha pa por a forma grupo den periodo cortico.

E publico sin embargo por a goza ayera di un parada netchi, sin ningun problema, bon organizacion y cu un publico cu a goza inmenso di e ambiente cutabata tin.



Riba e potret aki por mira e Reina Infantil di Carnaval 37, Sulaika Bareño kende a ser eligi entre e 18 candidatanan Diasabra anochi den un Stadion di RCA cu tabata repleto di fanatico di e candidatanan. Akinan por mira na momento cu Rory Arends ta coronando Sulaika, kende seguramente ta agradecido na tur su fanaticonan cu a apoye. Pa mas informacion lesa Popo y Skribidi.

Durante parada na San Nicolas Truck a pasa riba braza di homber

ORANJESTAD (AAN): For di momento cu Parada di Prins y Pancho a cuminsa, ya caba hendenan tabata tin e presentimento cu algo lo no bay bon Diadomingo pa Carnaval na San Nicolas.

DIARIO tabata vigilando e Parada di Prins y Pancho na diferente sitio y loke por a mira tabata algo sumamente espantoso! E manera cu cierto manchadornan di motocicleta tabata comportando nan mes den trafico tabata ponebo tene bo rosea aden y haci un oracion cu ningun hende lo resulta herida.

No obstante cu e grupo special di polis tabata pasa cada rato banda di e parada, toch cierto chofernan di jeep y manchadornan di motorcycle, trike, y quadrunner tabata haciendo cosnan cu por mira solamente den pelicularnan.

E asunto aki a cuminsa sali for di man te cu Polis a dicidi di pone un patrulla motoriza na altura di Spaans Lagoen pa asina descurasha pasamento di vehiculo pa loco.

Aparentemente e parada a yega bon San Nicolas, pero un noticia lamentable cu tabata circula ayerardi tabata di un accidente caminda un truck coriendo den Parada di Mucha a pasa riba braza di un homber cu pa mala suerte a trompeca y cay net dilanti wielnan.

Segun informe cu DIARIO a obtene di testigonan ta indica cu dilanti e truck cu ta lastra e trailer di e banda Time tabata tin algun hende ta reparti petchinan gratis di Shell. Dado momento varios hende a aglomera rond di e persona cu tabata reparti e petchi, y entre nan un cabayero cu a purba busca un petchi.

Di un of otro manera el a trompeca y a bay cay net dilanti wiel di e truck. E wiel a pasa net riba su braza y tabata bisto cu e otro wielnan tambe lo bay pasa riba e braza of e homber mes.

Un agente policial cu ta forma parti di e banda, a mira kico a pasa y a dal un bula for di e trailer meymey di tur e wayanan di sonido y a bay rescata e homber prome cu e wordo atropaya un biaha mas.

Mesora a pidi presencia di ambulance, y cu urgencia a ser transporta pa ricibi tratamiento medico. A constata cu el a sufri un fractura complica na su braza.